

CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA, O CONCELLO DE VILABOA E A ASOCIACIÓN AMIGOS DA TERRA PARA A EXECUCIÓN DO PROGRAMA “IMPLANTACIÓN E SEGUIMENTO DA COMPOSTAXE INDIVIDUAL A NIVEL MUNICIPAL”.

En Pontevedra, a 27 de decembro de 2017

REUNIDOS

D. César Mosquera Lorenzo, Vicepresidente da Deputación da Provincial de Pontevedra, en virtude das atribucións que lle confire o artigo 35.4 da Lei 7/1985, do 2 de abril, reguladora das bases de réxime local.

Don José Luis Poceiro Martínez, Alcalde do Concello de Vilaboa, actuando en virtude das facultades representativas que lle atribúen o artigo 21.1 b) da Lei 7/1985, de 2 de abril, reguladora das bases do réxime local e o artigo 61.1.a) da Lei 5/1997, do 22 de xullo, de Administración Local de Galicia.

Dona Raquel Fernández Rodríguez, Presidenta da Asociación Amigos da Terra.

E dando fe do acto, D. Carlos Cuadrado Romay, Secretario Xeral da Deputación Provincial de Pontevedra.

Actuando todos eles no exercicio dos seus respectivos cargos e na representación que detentan, e recoñecéndose reciprocamente capacidade para obrigarse nos termos deste documento,

EXPOÑEN

Primeiro. As obrigas legais fixadas en diversos textos normativos de aproveitamento dos restos orgánicos dos residuos municipais están moi lonxe de poder cumprirse nas datas fixadas de manterse inmóbil a situación actual. O obxectivo de compostar, ó menos, o 25% da fracción orgánica antes do 2020 non se poderá acadar senón se dan xa pasos firmes e decididos nesta dirección.

Para revertir esta situación a Deputación Provincial de Pontevedra está a potenciar á compostaxe- en colaboración cos concellos- a través do seu Plan Revitaliza no que aposta, basicamente, polos Compostadores Individuais (en adiante COIN), os

Centros de Compostaxe Comunitaria (en adiante CCC) e as Plantas Comarcais de Compostaxe (PCC)

Ademais, para consolidar o Plan REVITALIZA, a Deputación puxo en marcha unha serie de axudas que permitirán aos Concellos facer fronte aos sobre-custos derivados da súa posta en marcha no período de tránsito do actual sistema de recollida e tratamento ao novo sistema baseado na compostaxe, sendo 24 os Concellos adheridos á liña 1, que lles permitirá dispoñer dun plan de residuos individualizado, e 5 os beneficiarios da liña 2, que ten por obxecto subvencionar a adquisición dos COIN, CCC e demais material complementario (remolques, trituradoras etc..).

Segundo. En relación aos CCC a Deputación xa ten instalados en 24 concellos da provincia un total de 57 con 386 Unidades Modulares de Compostaxe (en adiante UMC), con capacidades unitarias para tratar a FORM producida por entre 60 e 300 persoas, que funcionan perfectamente e contan con todos os parabéns das veciñas e veciños que participan no proceso; estes CCC están funcionando baixo a supervisión dos técnicos do Plan REVITALIZA que desenvolven as súas funcións de maneira temporal e transitoria ata que a súa implantación sexa completa e os Concellos asuman a súa xestión íntegra.

Terceiro. En canto aos COIN, a Administración Provincial está traballando para ter instalados na primeira metade do 2018 un importante número deles nos cinco concellos desta provincia que teñen accedido á Liña 2, cunha aposta clara pola colaboración cos concellos para a posta en marcha dun ambicioso plan de compostaxe individual (en adiante COIN) que virá a complementar a actividade dos centros de compostaxe comunitaria (CCC) e das futuras plantas de compostaxe comarcais (PCC).

Sen embargo, como queira que a Deputación de Pontevedra carece dos medios técnicos necesarios para iso e a fin de garantir que a implantación destes COIN resulte eficiente, así como asegurar o seu seguimento, a Administración Provincial tense decantado pola aplicación dunha política colaborativa e inclusiva que permita integrar dun xeito harmónico a todas aquelas asociacións cidadáns sen ánimo de lucro posuidoras de coñecementos e cunha mínima presenza/implantación previa no eido da compostaxe individual, así como na acción social que esta leva consigo.

Esta colaboración provincial será transitoria durante o tempo necesario para o seguimento dos COIN municipais xa instalados o ou a piques de instalar (un ano desde a instalación), xa que posteriormente será o Concello quen asuma en exclusiva ditas funcións a través das formas de xestión que estime oportunas.

Cuarto. Entre as asociacións mencionadas no punto anterior atópase Amigos da Terra, entidade ecoloxista sen ánimo de lucro cunha traxectoria de traballo real no Concello de Vilaboa, sendo a única que historicamente ten desenvolvido actividades de compostaxe en COIN neste concello. Concretamente ten realizado, en varias etapas, a instalación dun total de preto dos 300 COIN e levado o seu seguimento e control ó longo de aproximadamente os 6 últimos anos, amosando unha notábel presenza social e unha boa interacción coa veciñanza deste Concello.

Dita Asociación ten, ademais, entre os seus fins:

- Protexer o medio ambiente, entendido no máis amplo senso.
- Promover alternativas baseadas no desenvolvemento sostible.
- Promover a educación integral a todos os niveis e en todos os ámbitos,
- Fomentar a formación ambiental a todos os niveis, tanto a especialistas, técnicos e profesionais de diversos colectivos, como público en xeral.
- Complementar as actividades desenvoltas por distintas Administracións nas materias sinaladas.

En relación con este último aspecto, a Asociación Amigos da Terra é promotora de diversos proxectos como o denominado **“A implantación e seguimento da compostaxe individual a nivel municipal”**, que está dirixido a cubrir as necesidades de atención a tódolos habitantes residentes en vivendas dotadas das mínimas condicións como para permitir unha doada instalación dun COIN nas mesmas.

Este proxecto, que vería a complementar a actividade temporal despregada pola Deputación neste eido no Concello de Vilaboa, poderá ser obxecto de subvención ao amparo do previsto no artigo 23 do Regulamento de Servizos das Corporacións Locais, aprobado polo Decreto de 17 de xuño de 1955.

Quinto. Pola súa banda o Concello de Vilaboa está adherido ao Plan REVITALIZA e dende o primeiro momento ten participado activamente en todas as fases de

implantación do mesmo, tendo instalados e a pleno rendemento, en diferentes localizacións, 3 centros de compostaxe comunitario cun total de 23 unidades modulares; tamén ten en funcionamento preto dos 300 COIN, procedentes doutras entidades ou organismos alleos á Deputación.

Ademais, dentro da actual segunda fase, ten solicitado, acadado e finalmente asumido a súa participación activa na Liña-2, na que precisa da colaboración provincial para desenvolver o novo sistema de tratamento de residuos, así como a participación activa da Asociación Amigos da Terra na información para a posta en marcha e seguimento dos COIN previstos para cubri-la totalidade do seu Concello, que se estima nunha cantidade de 1.600, incluídos os xa instalados a data de hoxe e os que se atopan en previsión de instalación non procedentes da compra prevista dentro do REVITALIZ Liña-II.

Polo tanto, a súa elección ven determinada por ser o Concello -dos cinco beneficiarios da subvención da liña 2- que está en mellor disposición para implantar canto antes o cambio de sistema de tratamento de residuos baseado na compostaxe.

Que en virtude das consideracións anteriores, a Deputación de Pontevedra, o Concello de Vilaboa e a Asociación Amigos da Terra acordan subscribir o presente convenio de colaboración de acordo coas seguintes

CLÁUSULAS


I.- OBXECTO.

O presente convenio ten por obxecto establecer as bases de colaboración entre a Deputación Provincial de Pontevedra, o Concello de Vilaboa e a Asociación Amigos da Terra para levar a cabo o programa “**A implantación e seguimento da compostaxe individual a nivel municipal**”, na totalidade do territorio do Concello de Vilaboa, de acordo cos seguintes obxectivos:




- Obxectivos xenéricos do Proxecto

1. Tratar por compostaxe a totalidade da fracción orgánica producida nas vivendas nas que se teñan adscritos COIN, incluíndose nesta tanto a

convencional doméstica do fogar (restos cociña/restos comidas), como a de parcelas, hortas, xardíns, etc. comprendidos na vivenda.

- 
2. Consecuencia do anterior, impedila entrada no circuíto de xestión do lixo do Concello de calquera tipo de residuo orgánico de tipo biodegradábel producido nas vivendas servidas. Neste sentido consecuentemente entendemos e consideramos esta acción como de “prevención” antes que de “reciclaxe” deses residuos.

- Obxectivos Específicos do Proxecto

- 
- 
- 
1. Proveer dos materiais adecuados (COIN e materiais complementarios) para implantalo tratamento “*in situ*” da fracción orgánica dos residuos municipais (en adiante FORM) en tódalas vivendas coas condicións mínimas adecuadas para a instalación e uso dun COIN.
 2. Proveer dun sistema eficiente e gratuíto para o acondicionamento dos residuos de xardín, horta, finca, etc. producidos nesas mesmas vivendas, a fin de que podan ser doadamente utilizados como elementos de co-compostaxe e de acción estruturante das FORM, articulándose dúas vías de actuación: unha primeira consistente en poñer a disposición de tódalas vivendas participantes que así o soliciten un servizo de trituración gratuíta a domicilio previa chamada e por orde das peticións. Outra adicional consistente na cesión temporal en concepto de préstamo de micro-trituradoras que o cidadán recollerá no almacén/taller previsto a tal efecto e que devolverá no mesmo lugar unha vez rematada a faena de trituración, por medios propios, do material ligno-celulósico producido na súa vivenda.
 3. Adicionalmente facilitarase o auto-aprovisionamento de material estruturante preciso para a compostaxe para todas aquelas vivendas participantes nas que non se dispoña dos materiais adecuados para facelos (ramas e similares).

II.- OBRIGAS DO CONCELLO DE VILABOA

O Concello de Vilaboa comprométese mediante o presente Convenio a:

- Facilitar a Amigos da Terra o listado completo dispoñíbel (nome e dirección) dos titulares das vivendas nas que se prevea ir instalando os COIN adquiridos a través da axuda económica concedida pola Deputación de Pontevedra .
- Ir poñendo a disposición de Amigos da Terra tódolos COIN, e tódolos seus apeiros funcionais asociados, adquiridos mediante a axuda económica da Deputación de Pontevedra.
- Facilitar a Amigos da Terra a cantidade, características e lugar onde están instalados, ou estea previsto instalar, tódolos COIN do Concello de Vilaboa cuxa procedencia sexa diferente aos obtidos/financiados a través do proxecto REVITALIZA da Deputación de Pontevedra.
- Facilitalo o acceso aos veciños participantes e, na medida do posíbel, mediar e colaborar na relación con estes.

III.- OBRIGAS DA DEPUTACIÓN DE PONTEVEDRA

A Deputación de Pontevedra comprométese mediante o presente Convenio a:

- Garantila cooperación, soporte e asistencia do, equipo de técnicos do Plan REVITALIZA adscrito ao Concello de Vilaboa co persoal de Amigos da Terra.
- Colaborar co persoal de Amigos da Terra para facilitala subida de datos de seguimento dos COIN ao programa de control do REVITALIZA.
- Financiar o proxecto **“A implantación e seguimento da compostaxe individual a nivel municipal”** na totalidade do territorio do Concello de Vilaboa, cunha achega máxima de **80.800,00 euros**, a abonar á Asociación Amigos da Terra a modo de compensación polos diferentes gastos asociados ás actividades de explicación inicial, instalación, seguimento e control dos COIN.

IV.- OBRIGAS DA ASOCIACIÓN AMIGOS DA TERRA.

A Asociación Amigos da Terra comprométese, mediante o presente Convenio, a desenvolver o proxecto “**A implantación e seguimento da compostaxe individual a nivel municipal**” segundo o seguinte detalle:

- Actividades específicas do Proxecto

1. Colaborar co Concello de Vilaboa e co equipo do REVITALIZA na captación de participantes na compostaxe individual por medio de charlas, comunicados, etc., así como na formación inicial por grupos das persoas participantes nos COIN.
2. Realización de charlas/coloquios informativos cos veciños das diferentes zonas de instalación dos COIN.
3. Cada charla/coloquio ten de ser anunciada ós veciños, debe contar cunha asistencia mínima de 6 veciños e ter unha duración mínima de 2 horas efectivas.
4. O máximo previsto de charlas/coloquios é de **20** e o seu cometido é o de complementar/suplementar nun ámbito mais social as informacións particulares que recibirán os participantes nas súas vivendas.
5. Facelo seguimento individualizado a tódolos fogares con COIN instalado, realizando unha media dunhas 6 visitas a cada vivenda con COIN cedido en uso e dentro do período máximo de 1 ano contado dende a data de aprobación da partida de COIN na que están incluídas ditas vivendas.
6. A efectos de contabilización de tempos, considérase que cada visita ocupará un tempo de aproximadamente 1 hora, incluídos os tempos dos desprazamentos ida/volta á vivenda.
7. Na 1ª visita (coincidindo coa entrega/instalación do COIN) aproveitarase para, como mínimo, dalas explicacións precisas para o bo uso do COIN, así como do listado de “boas prácticas” na xestión do lixo da vivenda. Nesa 1ª visita é recomendable a presenza de algún dos técnicos do equipo de Vilaboa do REVITALIZA.
8. Nas seguintes visitas, que como media global serán ata 6 (pero podendo variar dende un mínimo de 3 ata un máximo a determinar segundo o que se considere preciso en cada caso concreto) faranse

revisións do funcionamento e histórico do COIN dende a anterior visita (episodios de cheiros, presenza de moscas e outros insectos, presenza de ratos ou similares, lixiviacións, etc.). Así mesmo: tomarase temperatura do material en proceso, se fose preciso corríxiranse humidade, esponxosidade, etc. do material en proceso e medirase o nivel de enchido actual (distancia da boca de carga até a superficie superior do material en proceso).

9. Tódolos datos adquiridos en todas e cada unha das visitas serán subidos á aplicación disposta a tan fin pola Deputación.
10. Constatación da paulatina, sucesiva, continuada e dentro de prazos conforme a requirimentos, da subida dos datos de seguimento/control dos COIN na aplicación do REVITALIZA.

V.- ORZAMENTO DE GASTOS DA ACTIVIDADE A REALIZAR POR AMIGOS DA TERRA

A Asociación Amigos da Terra desenvolverá as actividades programadas, segundo se definen na cláusula anterior, conforme a un orzamento cuxos importes inclúen os gastos de desprazamentos, tempo das visitas, emisión de informes ou información aos veciños. Neste sentido, establécense as compensacións económicas a tanto alzado que de seguido se citan:

- Por cada visita domiciliaria a cada un dos COIN, sexa para entrega/instalación, e/ou para control/seguimento, sempre de acordo coas premisas reflectidas nas actividades específicas do proxecto: 8,00 €.
- Número de visitas anuais previstas-de media- a cada vivenda con COIN asignado, de acordo coas premisas reflectidas nas actividades específicas do proxecto e que estará afectado de certa variabilidade atendendo ás particularidades de cada fogar : 6
- Máximo total previsto dos COIN aprovisionados polo concello a cargo do REVITALIZA (entrega/instalación/control/seguimento): 1.260 unidades.
- Máximo total previsto adicional de outros COIN xa instalados, ou por instalar, procedentes doutras orixes: 340 unidades.
- Total previsto COIN: 1.600 unidades.
- Orzamento máximo previsto para as visitas a vivendas con COIN:
- $(48 \text{ €/COIN} \times 1.600 \text{ COIN}) = 76.800 \text{ €}$.

- Por cada xornada de información cos veciños/as: 200 €.
- Máximo total previsto de xornadas/coloquios informativos veciños/as: 20.
- Orzamento máximo previsto para xornadas/coloquios informativos: **4.000 €.**

Orzamento máximo total previsto: 80.800 €.

VI- FINANCIAMENTO DA ACTIVIDADE.

1.- A Deputación Provincial de Pontevedra financiará o proxecto “**A implantación e seguimento da compostaxe individual a nivel municipal**”, para cubri-la totalidade do territorio e poboación do concello de Vilaboa, cunha achega máxima de **80.800 €**, a abonar á Asociación Amigos da Terra, que se afrontará con cargo á aplicación **17/923.1623.489.06** do vixente orzamento provincial.

2.- A subvención da Deputación é compatible coa percepción doutras subvencións ou axudas, públicas ou privadas, que a Amigos da Terra obteña para a mesma finalidade, sempre que o seu importe, xuntamente co da subvención provincial, non supere en ningún caso o importe total do gasto efectivamente xustifico.

3.- No caso de que a concorrencia de axudas ou subvencións supere o importe do gasto efectivamente xustifico, minorarase a aportación provincial no importe necesario para darlle estrito cumprimento ao apartado anterior.

VII.- PAGAMENTO DA ACTIVIDADE.

A Deputación Provincial de Pontevedra comprométese a librar os fondos establecidos na cláusula anterior da seguinte forma e nos seguintes prazos:

1.- O 50% do orzamento de cada unha das partidas de COIN das que se teña feito o estudio concreto de instalación, no prazo de 10 días hábiles desde a presentación do estudio correspondente, no que debe constar o número concreto de COIN por cada partida e que debe estar conformado polos técnicos provinciais.

A fin de evitar unha excesiva fragmentación, o número de COIN a instalar por partida non poderá ser nunca inferior ó 10% do total previsto.

As diferentes partidas poden perfectamente solaparse no tempo, co único límite de que todas elas deben ter sido instaladas antes da data límite marcada na cláusula IX, podendo así producirse seguimentos de diferentes cantidades de COIN ó longo do tempo de desenvolvemento do traballo.

2.- O 50% restante do orzamento de cada partida seralle abonado á Amigos da Terra unha vez transcorrido un ano dende o inicio efectivo da actividade e previa presentación da seguinte documentación:

- Memoria explicativa da realización completa das actividades, con expresión técnica e cuantitativa dos resultados obtidos. Dita memoria detallará, así mesmo, o número de actividades realizadas, especificando o seu importe unitario e total, e deberá estar conformada polos técnicos provinciais do Plan Revitaliza.
- Xustificación do cumprimento das obrigas impostas (difusión da subvención, etc.).
- Indicación e valoración de se foron acadados os obxectivos propostos.
- Deberá acreditar que non está incurso en causa de prohibición para percibir axudas ou subvencións públicas ou para contratar mediante declaración responsable asinada polo seu representante e presentar ou autorizar á Deputación para que obteña as certificacións de Facenda do Estado e da Tesourería Xeral da Seguridade Social de que a entidade que representa está ó corrente nas súas obrigas tributarias.
- Declaración doutras axudas ou subvencións solicitadas ou concedidas para a mesma finalidade.
- Certificación da conta bancaria.
- Acreditación do cumprimento das obrigas asumidas na cláusula oitava mediante a aportación de documentos nos que conste a publicidade do financiamento provincial.

VIII.-PUBLICIDADE DO FINANCIAMENTO PROVINCIAL.

1.- Na publicidade pola que se dea a coñecer a realización das actividades, por medios escritos, radiofónicos, audiovisuais ou Internet, deberase facer constar sempre o financiamento da Deputación Provincial de Pontevedra.

2.- Coa memoria e conta xustificativa achegaranse documentos que acrediten o cumprimento desta obriga de Amigos da Terra.

IX.- TERMO PARA A REALIZACIÓN DA ACTIVIDADE E PRAZO DE XUSTIFICACIÓN.

1.- As actuacións que son obxecto de financiamento provincial, tal como están descritas na cláusula cuarta, deberán estar rematadas no prazo máximo de 1 ano contado dende o efectivo inicio da actividade en cada partida de COIN instalada (da que se levantará a oportuna acta) e como máximo a **31 de agosto de 2019**, polo que a derradeira partida de COIN deberá ter aprobada a súa instalación antes do **31 de agosto de 2018**.

2.- Unha vez transcorra o ano desde o efectivo inicio da actividade de cada partida de COIN instalada, Amigos da Terra deberá presentar a xustificación documental á que se refire a cláusula sétima no prazo máximo de tres meses, tendo en conta así mesmo as datas máximas establecidas no parágrafo anterior

3.- De conformidade co disposto no artigo 70.3 do Regulamento da Lei de subvencións (Real decreto 887/2006, do 21 de xullo), transcorrido este derradeiro prazo sen que se teña recibido xustificación ningunha, a Unidade xestora remitiralle un requirimento a Amigos da Terra para que a presente no prazo improrrogable de quince días.

A falla de xustificación da subvención neste prazo excepcional conlevará a perda da subvención e demais responsabilidades previstas neste convenio e na lexislación aplicable ao respecto. Aínda así, a presentación da xustificación neste prazo adicional non eximirá a Amigos da Terra da sanción que lle poida corresponder de conformidade co disposto na Lei de subvencións.

4.- O abono da subvención materializarase mediante ingreso na conta da entidade financeira indicada por Amigos da Terra na documentación aportada.

Se tiveran transcorrido máis de catro meses dende a axeitada e correcta xustificación dos compromisos adquiridos sen que tivera cobrado o importe que lle corresponda, Amigos da Terra terá dereito ao abono dos xuros de demora, ao tipo de interese legal, que se devenguen dende a finalización do prazo de catro meses ata o momento no que se faga efectivo o pagamento.

X.- ACREDITACIÓN DO CUMPRIMENTO DAS OBRIGAS TRIBUTARIAS E COA SEGURIDADE SOCIAL.

1.- Amigos da Terra deberá acreditar, con carácter previo á sinatura deste convenio e logo, con carácter previo ao pago da subvención, que se atopa ao día no cumprimento das obrigas tributarias coa Administración do Estado, coa Comunidade Autónoma e coa Seguridade Social; e, para tal fin poderá autorizar á Deputación a que a obteña telemáticamente os correspondentes certificados.

2.- A acreditación de non ter débedas coa Deputación Provincial determinarase de oficio por esta.

XI- CONTROL FINANCEIRO DA DEPUTACIÓN E DOS ÓRGANOS DE CONTROL EXTERNO.

1.- Consonte ao disposto nos artigos 44 e seguintes da Lei 38/2003, de 17 de novembro, xeral de subvencións, e nos artigos 41 e seguintes da Lei 9/2007, de 13 de xuño, de subvencións de Galicia, Amigos da Terra poderá ser requirida pola Intervención provincial para a realización dun control financeiro sobre a subvención outorgada, co fin de acreditar a efectiva aplicación dos fondos á finalidade para a que foron concedidos, o correcto financiamento da actividade e o cumprimento de tódalas demais abrigas formais e materiais que lle impón o presente convenio de colaboración.

2.- Asemade, de acordo co previsto na Lei 6/1985, de 24 de xuño, do Consello de Contas de Galicia, Amigos da Terra queda sometido aos procedementos de

fiscalización que leven a cabo o Consello de Contas de Galicia ou, no seu caso, segundo o previsto na Lei orgánica 2/1982, de 12 de maio, aos procedementos de enxuciamiento contable que poida incoar o Tribunal de Contas, e a calquera outro órgano de control, nacional ou europeo.

XII.- REINTEGRO, INFRACCIÓNS E SANCIÓN.

1. O incumprimento dalgunha das cláusulas previstas no presente convenio de colaboración poderá conlevar a obriga de reintegro parcial ou total dos fondos recibidos, así como ao pago dos xuros de demora que se devenguen dende o día no que se realizou o pago ata o momento no que se acorde a procedencia do reintegro.

O procedemento de reintegro iniciarase de oficio e a súa tramitación farase de conformidade co disposto nos artigos 29 e ss da Ordenanza Xeral de Subvencións da Deputación de Pontevedra, dándolle en todo caso audiencia ao interesado.

2. Sen prexuízo do anterior, o dito incumprimento tamén poderá ser constitutivo dalgunha das infraccións tipificadas na Lei 38/2003, de 17 de novembro, ou na Lei 9/2007, de 13 de xuño, de subvencións de Galicia, séndolle de aplicación o cadro de sancións previstos nas normas citadas.

XIII.- INCORPORACIÓN AO REXISTRO PÚBLICO DE SUBVENCIONS E PUBLICACIÓN DA SUBVENCIÓN CONCEDIDA.

1.- No cumprimento do disposto no artigo 20.1 da Lei 38/2003, xeral de subvencións, e demais normativa de desenvolvemento, os datos da subvención concedida e a identificación de Amigos da Terra serán remitidos á Intervención xeral do Estado, para que sexan incorporados á Base de Datos Nacional de Subvencións, coa exclusiva finalidade prevista no dito precepto e co debido respecto á protección dos datos de carácter persoal, segundo o previsto na Lei orgánica 15/1999, de 13 de decembro.

2.- Asemade, no cumprimento do disposto no artigo 16.3 da Lei 9/2007, de 13 de xuño, de subvencións de Galicia, a Deputación remitiralle a mesma información á

Consellería de Economía e Facenda, co fin de que a incorpore ao rexistro público de axudas, subvencións e convenios da Comunidade Autónoma de Galicia.

3.- Segundo o previsto no artigo 18 da Lei 38/2003, de 17 de novembro, xeral de subvencións, a concesión da subvención a Amigos da Terra será publicada no Boletín Oficial da Provincia de Pontevedra e na páxina web www.depo.es.

4.- Así mesmo, os datos do convenio proposto serán incorporados no rexistro provincial de convenios (CIVIDAS), ós efectos do cumprimento das obrigas de comunicación ó Tribunal de Contas.

XIV.- VIXENCIA DO CONVENIO, PRÓRROGA OU MODIFICACIÓN.

1.- O prazo de vixencia do presente convenio establécese desde a data da súa sinatura ata o **31 de agosto de 2019**.

2.- Previa solicitude de Amigos da Terra, realizada alomenos dous meses antes da data do fin do prazo, o convenio poderá ser prorrogado por acordo expreso de ambas as dúas partes, e previos os informes preceptivos da Unidade xestora, da Secretaría e da Intervención da Deputación.

3.- Tamén por acordo expreso de ambas as dúas partes e por causa debidamente xustificada, e previos os mesmos informes indicados no apartado anterior, o convenio poderá ser obxecto de modificación.

XV.- NATUREZA, INTERPRETACIÓN, MODIFICACIÓN E XURISDICIÓN COMPETENTE.

1.- O presente convenio ten natureza administrativa e para resolver as dúbidas que xurdan na interpretación das súas cláusulas aplicaranse as disposicións contidas na Lei 38/2003, de 18 de novembro, xeral de subvencións, e na Lei 9/2007, de 13 de xuño, de subvencións de Galicia; supletoriamente aplicarase a lexislación de contratos do sector público.

2.- A interpretación das dúbidas e lagoas que poidan xurdir na aplicación do presente convenio corresponderalle á Presidenta da Deputación, previos os informes preceptivos da Unidade xestora, da Secretaría e da Intervención provincial.

3.- Corresponderalle aos órganos da xurisdición contencioso-administrativa, segundo a distribución de competencias prevista na Lei 29/1998, de 13 de xullo, reguladora de dita xurisdición, o coñecemento das cuestións litixiosas que poidan xurdir como consecuencia do presente convenio.

XVI.- RESOLUCIÓN

O presente convenio resolverase:

- a) Por denuncia unilateral con preaviso de dous meses ou por mutuo acordo.
- b) Por incumprimento total ou parcial dalgunha das estipulacións que o regulan.
- c) Polo vencemento do prazo de vixencia.
- d) Polo transcurso do tempo fixado sen que se execute e/ou xustifique a realización do obxecto da subvención nos termos establecidos neste convenio.
- e) Por decisión xudicial declaratoria da nulidade do convenio

E en proba de conformidade, asinan por triplicado exemplar o presente convenio no lugar e data indicados no encabezamento.

O Vicepresidente da Deputación
Provincial de Pontevedra

César Mosquera Lorenzo

O Alcalde do Concello de Vilaboa

José Luis Poceiro Martínez

A Presidenta da Asociación
Amigos da Terra

Raquel Fernández Rodríguez



O Secretario Xeral da
Deputación Provincial de Pontevedra

Carlos Cuadrado Romay

